

四庫全書

集部

欽定四庫全書

集部

海陵集卷十二至十四

詳校官庶吉士臣李如筠

主事臣呂雲棟覆勘

總校官編修臣王燕緒

校對官編修臣盧遂

謄錄監生臣王爾照

欽定四庫全書

海陵集卷十二

宋 周麟之 撰

內制

郊祀冊文三首

聖祖

伏以先天之符肇自聖祖配極流曜是興炎圖迎陽稱  
禋夙夜熙事右序我宋永孚于休

昊天上帝

伏以明明上天錫宋成命世用饗帝維翼厥心初陽協  
辰秩祀昭報永祈孚佑降福無疆

皇地祇

伏以於皇柔祇母育萬物順承天道協佑我民至景迎  
長合祛毖化斂事以察申錫蕃釐

永祐陵殯官修換神帳表文

仙寢安靈將繕修於頌幄吉辰興事暫遷寓於醉容敢

中圭薦之誠尚迪鑒臨之祉

郊祀禮成奏謝諸陵表文

寅保丕圖恪遵舊典候黃宮之協氣秩紫時之明禋假  
廟薦芳就陽升燎帝祖嘉饗神人具依實繫保佑之休  
克就齋明之事敢申虔謝並迓洪禧

天中節茅山崇禧觀開建祝聖壽道場青詞

燕禱令序適屆於炎輝鶴嶺真宮載延於景馭爰舉歲  
祈之典茂迎天錫之休仰覲鑒臨默垂孚佑

太一宮開啟天中節道場青詞

火行標序電夢告符獲光結于昌圖茲載臨于誕月預  
啟十神之幄欽迎八景之輿伏願帝鑒垂光天休申命  
丕鞏延洪之祚永儲錫羨之祥

太一宮介福殿開啟皇帝本命道場青詞

天心垂佑方贊于寶圖日紀運行載臨于元命爰被珍  
臺之邃具陳熏席之嚴庶格真游式闋妙蔭保丕平之  
永祚綏萬壽之休祺

郊祀大禮太一宮青詞

祓泰壇而稱祀將舉上儀款煩幄以告期預祈靈鑒仰  
貴神之協祐相熙事之涓休敢露潔誠冀垂昭應

郊祀大禮宮觀青詞

嘉壇展事將修三歲之禋靖館告虔庶格九清之鑒仰  
祈善應克相休成敢竭齋精預迎貺施

郊祀大禮元天大聖后青詞

伏以宗祈上圜祇見真祖琳宮斯闕藥御所臨爰飭侍

祠之臣往申報本之義冀垂沖鑒用迪孚休

太一宮開啓皇太后生辰道場青詞

伏以母闈鍾愛方奉於徽音冬籥戒寒聿臨於誕序載  
被殊庭之幄虔敷祕洞之科用輯真祺仰增慈算躬受  
泰玄之笑永承長樂之顏

天慶諸觀恭謝道場青詞

伏以清顯儲休獲欽承於寶命嘉壇展采爰肅奉於嚴  
禋迨此涓成實繇助順祇按薰修之式用伸禮答之誠



仰覲赫臨永垂孚佑

郊祀大禮前三日寧壽觀祈晴青詞

伏以靈承帝事謁款陽丘冀上象之昭垂俾時暘之載  
若仰祈監佑沆相休成

太一宮介福殿開啟皇帝本命道場青詞

六子循環紀命元之復旦九清降鑒佑邦統之當天載  
被殊庭恭延列御按中科而演祕導景貺以迎休願顧  
精衷默垂善應

郊祀大禮奏告祝文

天地

伏以荷乾坤之施思答洪休合丘澤之祠恪循舊典迺  
卜陽來之旦式陳郊見之儀敢列至忱預申虔告

宗廟

伏以祗率燕謀肅稱元祀將歲郊柴之禮必先廟裸之  
恭茲惟故常敢以前告

別廟

伏以穆卜天正將郊上園假廟薦芳肅若舊典諒茲遺  
懿監我涓修

社稷

伏以土穀大神功施萬世今將以天統上正祇事郊廟  
亦當飭有司修血祭于社稷以申報本之義吉蠲茲始  
敢不告虔

郊祀天大禮前二日奏告太祖皇帝太宗皇帝配  
侑祝文

伏以國有大報禮行於郊欽惟祖宗陟配天地肆茲景  
至誕舉彌文先事告虔仰祈靈監

朝獻景靈宮侍從官分詣祖宗帝后前行禮祝文  
伏以欽修上祀夙款闕庭仰惟列聖之靈並宅棲真之  
宇方飭恭而朝獻爰分命以侍祠敢覬昭明默垂監佑  
郊祀大禮前一日朝饗太廟七祀祝文

三歲大報靡神不賓矧惟廟庭舊有七祀各迪令薦相  
予休成

輓祭祀文

大輅鳴鑾親祠陽時展軫在御犯輶而驅茲惟舊章光  
事命祭六虬按節繫爾神休

天申節內中祝皇太后聖壽道場齋文

伏以節紀誕彌方紹休於聖緒恩深載育宜歸福於慈  
闈虔依不二之門仰祝無疆之算上乘孚佑感四表之  
歡心長樂燕寧增萬年之壽祉

景靈宮樂章

皇帝還位乾安之曲

帝臨閔庭逆釐上靈神保安坐肅若有承嘉觴既申德  
聞惟馨靈光留俞祚我億齡

尚書徹饌吉安之曲

普淖既薦苾芬孔時神嗜而顧有來宴娛饗矣將徹載  
欽載祗展詩以侑益鞶厥熙

皇帝降殿乾安之曲

我秩元祀上推鴻源展事有徯祲威肅然升城既降秉

心益虔荷天之休于千萬年

皇帝還大次乾安之曲

帝將于郊昭事上祀爰茲畢觴復即于次  
飈旂載旋容旌杳騎維皇嘉承錫祚昌熾

太廟樂章

皇帝盥洗乾安之曲

維皇齋精駿假于廟觀盥之初惟以潔告  
行承祖宗恤祀昭孝誠心有孚介福斯報

皇帝還位乾安之曲

於穆清廟明禋是躬卿士駿奔助我肅雝灌鬯已事精誠交通卻立以思儻然其恭

奉俎豐安之曲

有碩其牲登于大房肅展以饗庶幾迪嘗匪膋是告我民其康保艾爾後垂休無疆

皇帝再盥洗乾安之曲

盥至于再潔誠俞孚帝用祇薦靈咸嘉虞騰歌臚驩會



于軒朱觀厥顯若受福之符

皇后賀皇帝郊祀禮成表

至景臨圭紀迎長之令序園丘奠璧躬報本之明禋三  
神宴娛萬福降輯恭惟皇帝陛下聖圖廣大休德昭清  
歲三歲之上儀迪一純之嘉薦靈承帝事備慶齋明之  
衷克享天心永膺昌熾之祚叨陳壺則幸際邦榮聞紫  
時之竣祠望翠華而胥慶

天申節集英殿大宴樂語

教坊致語

臣聞澄河一色乃璿霄誕聖之期喬嶽三呼當寶殿稱觴之會信使拭圭而來賀羣工委佩以在廷祇仰睟容具張茲宴恭惟皇帝陛下懋昭大德統輯羣元睿澤無私雲行而雨施宸文有煥漢倬以星輝乾坤扶再造之基禮樂洽三登之化適屆生商之序肆均在鎬之歡琬液浮樽同上萬年之壽琅璈度曲翕宣九奏之和臣等幸際昌辰叨塵法部願采輿人之誦載颺治世之音上

奉宸嚴敢進口號

口號

曉開閭闔黼帷張五色凝雲捧玉皇風入舜絃聲蕩漾  
日浮堯莢景舒長猗蘭殿上霞飛棟華萼樓前露滿囊  
共指南山申善頌太平天子萬年觴

闕

天臨黼座日轉繒峯觴汎九霞式侑宮桃之醉樂陳三  
夏宜參嶰竹之鳴上奉皇歡教坊合曲

勾小兒隊

萬玉充庭五英備奏  
盍詔垂髻之侶來陳秉翟之儀  
綏奏宮商教坊小兒入隊

隊名

帝宸開金鑑垂裳舞玉梢

問小兒隊

禁殿風來光動槐龍之影  
童觴霧集歡同竹馬之遊  
必有敘陳分明敷奏

小兒致語

臣聞祥開甲觀丕昭大電之符宴啟鈞臺誕布需雲之澤一人示惠萬寓同歡恭惟皇帝陛下道貫堪輿仁孚動植聖圖天廣大蓋本無私王度日清夷率歸有極饗帝受萬年之筴寧親得四表之心當聖旦之叢休仰皇慈之逮下雲開宮扇同瞻北極之尊露滿帝觴恭上南山之壽臣等冒趨禁所竊忤童心沛水醑歌與習飛雲之吹周庭合奏欲陪舞鳳之翔未敢自專伏候進止

幻雜劇

帝樂九成已觀於舜舞天容一笑或取於齊優宜陳平  
樂之嬉更效華封之祝緩調雲呂雜劇來歟

放小兒隊

鈞天廣樂畢陳萬舞之容沂水游童久曳兩髦之采其  
湛曰樂復詠而歸再拜天階相將好去

勾女童隊

千官會弁初覆於宮花九陛鳴鞘再臨於禁宸宜度結

風之曲更呈回雪之姿徐韻金絲女童入隊

隊名

寶露霑堯醴流風入楚腰

問女童隊

玉琯含風下丹山之采鳳文茵薦地翻洛浦之驚鴻必有芳詞即宜敷奏

女童致語

妾聞太微五府輯聖瑞以題期南極一星炳天符而介

壽兆啟流虹之旦均霑湛露之恩恭惟皇帝陛下大德  
好生重明麗正東朝視膳刑孝愛於四方乙夜觀書洞  
憲章於六學庶事列日星之紀羣情同金石之和雖  
輿議稱太平猶思慎德以豐年為上瑞靡務多祥當莒  
花照灼之期講栢殿亨嘉之會三千年之上果色映仙  
觴十六拍之新聲歡騰壽曲妾等幸聯翠袂獲筮彤墀  
自顧微蹤比露葵之嚮日敢陳薄技効秋葯之披風未  
敢自專伏候進止



勾雜劇

星弁無譁方嘉賓之式燕天顏有喜謂小道之可觀暫  
停兆綴之容更獻詼諧之戲再賡妙引雜劇來歟

教女童隊

皇情普浹已具醕於榴盃晝景舒遲亦屢移於蓮漏宜  
縱凌波之步却為行雨之歸再拜天階相將好去

春貼子詞

皇太后閣六首

北極璿杓轉東朝繡戶開  
吾皇宴長樂親捧萬年杯  
遼殿猗蘭紫浮觴壽柏青  
瑤池演春算倍受八千齡  
曉箭催蓮漏君王問寢時  
光風浮玉瑄瑞靄映雲旗

笑看宮額試梅粧樓角千絲御柳黃  
盡道九重春色早  
太平天子是東皇

日照蟠桃萬點丹花前仙佩響珊珊  
他年採實供金母  
會見飛瓊捧玉盤

不用神丹噉藥瓊年登八十  
自身輕試臨玉案繡金錄

更覺春來眼倍明

皇帝閣六首

木鐸揚寬詔雲翹舞化風垂衣金殿裏聖德與天通

紅日升陽谷青輝應嶰簫萬方陶美化渾在泰和中

翠水冰融盡雕攏日上遲東風報花信先拂萬年枝

已過人日迎春馭直待階莫十葉開應是九門燈夕近

東皇欲駕六鼇來

鳳蓋龍車玉作輪北臨紫時謁三神已將福酒添眉壽

更祝椒觴一萬春

聖主清心仍寡欲  
惟於筆硯未忘懷  
彤廷仗下春朝散  
獨擁圖書坐損齋

皇后閣五首

沼苻微生綠宮梅  
暗度香五雲凝紫禁  
一氣轉青陽  
露沫千門柳風縈  
九畹蘭會聽鶯出谷  
行傍采桑壇  
勝裏金葩喜占新  
紅酥細字點宜春  
內庭也作人間戲  
自是時康樂事頻

銀鈎慣學君王帖寶軫頻聽淑女琴更與六宮循節儉  
釵頭不綴辟寒金

椒塗日暖燕差池又見瑤箱受福時欲使後宮歌德化  
試將彤管作春詞

端午貼子詞

皇太后閣六首

臯月乘天數慈闈奉母儀靈芝三萬歲樂府有新詞  
柳映金鋪麗菰黏玉俎香六宮隨鳳輦來獻九霞觴

覆戶雙人艾浮樽九節蒲更聞天子孝瑞筵扇堯廚

涼生浴殿藹蘭芳玉宇深沈晝漏長試誦瓊章開藥笈  
御爐風裊辟邪香

慈歡不為植萱叢聖子晨昏孝養隆況是九重當夏清  
偏于扇枕得清風

方開八袞慶修齡又捧榴盃拜紫庭一歲一添長命縷  
擬將萬縷獻慈寧

皇帝閣六首

赤伏題皇運朱明啟帝宸休符知有相此月是天申  
祝網湯仁布垂裳舜德敷五兵渾不用安事赤靈符  
日永三星正風薰萬宇涼要知垂艾意期與庶民康  
槐綠乍迷青羽蓋櫻紅已薦赤瑛盤太平節物年年好  
又見浮菖與浴蘭

西湖雨歇鑑奩開江面銀濤一線來自有雲山供四座  
聖君元不事池臺

碧琳宮殿晝翻書時見龍鸞落寶跗一念清非能却暑

不須更展北風圖

皇后閣五首

瑞靄浮龍鑑涼颺拂燕釵  
瑤鍾獻冰醴暑殿雪盈懷  
繞臂長生縷無非拓館絲  
還因衿締綌深念葛覃詩  
甘霑今年應禱祈屏除葷茹  
與君齊化行自是恩波遠  
何止春郊雨一犁

不貪鬪草事詩書漫採香  
芸辟蠹魚水日揮毫自忘暑  
滴殘宮硯玉蟾蜍



剪就冰綃月影團不須多羨女乘鸞  
君王瑤札親題處  
一樣蟾花點點丹

海陵集卷十二

欽定四庫全書

海陵集卷十三

宋 周麟之 撰

外制

林大鼐兼侍講

王人求多聞惟師古以建事儒者學古訓貴陳善以告  
君朕臨大昕之朝處幾政之暇每延鴻博用廣緝熙具  
官某窮經造微論事據正擢陞憲府美公議之有歸入

侍諫瑄信直臣之無隱既位諍臣之首宜叅講席之華  
陪子燕閒賴爾宏益尚究淵源之蘊毋忘紬繹之勤可  
又除吏部尚書

天官六職之尊周總以建邦之典吏部三銓之首唐兼  
於議政之臣自非詳練之才曷稱久虛之選具官某蘊  
雅亮之職持清恪之心風采素聞乎搢紳羽儀備見於  
臺省紀綱是任嘗深嫉乎官邪議論不阿方力陳乎治  
要今寘之於喉舌出納之地且觀汝以權衡銓綜之公

諒夙負於遠猷固不嫌乎詳試然流品具乎法而鑒裁  
存乎人爾惟明何事劇之難精爾惟正何吏姦之弗戢  
往率厥屬尚其懋哉可

陳相除權吏部侍郎

中臺之設六官允釐庶務小宰之敘羣吏實號貳卿必  
求才諳之優用付銓衡之重具官某器能精博襟度粹  
夷省戶為郎已著清華之望樞廷列屬益高慎密之風  
迨釋轡于使駢旋服察于宰士彌綸左右辨治雍容宜

升禁橐之聯往贊天官之治爾其盡鑒裁之妙使吏畏而不欺致流品之清使法行而無壅勉助而長益觀汝能可

宋樸除御史中丞

風憲之司體嚴望峻在漢侍書之任或周歷於三臺有唐執法之臣至踐更於五院蓋賢者能勝其任故用之必盡其才具官某寡慾而得剛在約而彌厲詘處于下位而無滯淹之嘆立登乎要路而無躡進之嫌歲中趨

遷尚念相見之何晚仗下執奏灼知所蘊之素深俾以  
薦冠徧儀烏府惟昔賢之踐橫榻不累月而必升矧今  
日之缺中司在長材其何忝往振紀綱之治副予推擇  
之公可

史才除右正言

朕闡廣言路延登正人冀聞讜辭裨我治道一士諤諤  
庶今見之以爾清才粹文雅有紀行學古從政士林仰  
焉年之彌高位則未稱應臺端之辟司柱後之書固已

小進之矣然在朕意終不欲以法吏之責煩老成也來  
居諫省補過拾遺搢紳之有忠邪政事之有得失言之  
毋隱朕所樂從可

魏師遜除殿中侍御史

御史耳目官也自六察而上皆吾遴選而入殿內糾非  
法肅百察于交戟之下者職益近望益崇固不可以非  
其人也爾局量渾厚風槩嚴慈踐更中外端操有聞服  
于臺察有察必舉是真得吾御史之職矣今橫榻既已



敘進而副端不可久虛汝以次升實為因任一賢用而紀綱舉一言進而朝廷尊是所望焉毋隳爾守可

祕閣修撰致仕劉一止除敷文閣待制

朕閱清風之頌喜周道之復興采鹿鳴之歌思漢儒之間作念獲成于大業敢自眩于成功有嘉侍從之臣能繼聲詩之體具官某學而筮仕老不廢文雖久伏於林丘實舊聯于簪橐脫冠謝朝列方自樂於餘年摘藻拔天庭猶未忘于夙習比覽奏篇之善益知歸美之誠此

盛德之事其何足以當之庶一代之文有可傳于來者  
爰升次對用賁褒章尚保令名以光晚節可

宋樸除端明殿學士簽書樞密院事

朕以本兵之地實闢大政之原東國元樞既有賴於一  
德之輔贊吾密命亦當求不貳心之臣思得其人與之  
共治具官某年高而德劬見博而智明樂道固窮嘗寄  
懷於丘壑得時則駕遂接武於夔龍惟平居之所養者  
厚而不為苟求故今日之所用者優而猶恐弗及宜釋

紀綱之寄與參帷幄之機壹乃志毋或蹈于二三慎乃  
猷毋或隳其終始往祇朕命益懋汝為可

莫濛再任大理評事

今之廷尉平其員省其事劇其秩滿而遷者蓋勞閱之  
深者也不則補外者多矣如爾之才敏而無滯不自用  
於吏牘之繁宜其願留再踐厥次因能而用何異於遷  
尚殫爾能以俟褒陟可

施鉅除監察御史

朝廷綱紀屬在憲臺六察之官皆吾耳目考擇惟慎每  
數才難以爾嘗膺選掄入踐烏府局量方雅朕固器之  
茲擁州麾渴見風矩爰畀賜環之命復歸我廡之班望  
實素孚中外自肅尚殫所蘊以稱簡知可

知常州錢周材除集英殿修撰

朕迹漢家之治觀樂府之歌崇禮官考文章時則有從  
臣之頌宣上德盡忠孝時則有刺史之詩於今求之見  
此作者以爾文兼麗則學造精深四戶聯榮嘗高潤色

之譽一麾出守久著承流之功能於畫諾之餘述是形容之美騰章來上嘉歎不忘進升祕殿之班增重專城之寄往祇予渙益懋爾猷可

太府卿徐宗說除權戶部侍郎

中臺六職分庶務之宏綱民部貳卿叅從臣之高選爰稽已試蓋得其人具官某以敏識達事經以通才了邦計長于貨府謹頒受之惟時攝是版曹嘉翰旋之有素凡嚴三歲之祀實董一司之繁迨此涓成允宜褒陟夫

禹疇用政足食為之先周典建官理財居其半惟得裕民之要是誠富國之方其悉乃心以稱朕意可

曾慥知廬州

朕惟兵休以來淮西數千里之地脫於戰衝拊摩歲深民亦用乂今廬江雖號方面然事簡而官最逸俗淳而教易孚典藩之臣可卧而治以爾學廣器裕優於牧民自荆易變卓見才刃深惟制閩之舊久矣祠庭之間老而撥煩尚有餘地矧是肥水豈勞剗裁爾惠下則流移

復而戶口增爾敦本則耕稼興而田野治勉集斯效竝  
觀厥成可

朱斐除大理少卿

臯陶以刑教祇德用不犯于有司文王之法立準人罔  
攸兼于庶獄朕深惟民命繫在理官安得直寬之流副  
予欽恤之意以爾德優而毅心和而平以古義決獄疑  
久踐揚于棘路以儒術飾吏事嘗趨走于丹墀遂由星  
省之華升處月卿之次念持平之有素豈間退之可安

趣下贊書俾還舊服庶革舞文之弊益觀請讞之精務  
究乃猷往祇厥敎可

陳夔除太常少卿

朕修禮樂以交三神之歡酌情文而成一代之典奉常  
實掌斯事少列必惟其人以爾風規粹清問學淵奧早  
揭儒範嘗叅憲綱以十翼之辭論辨乎經幄以二省之  
要審閱乎宰司言績並優見于詳試進貳卿寺僉曰汝  
宜朕將祇卜靈辰展采于層陸爾其講明熙事治儀于



曲臺濟子休成明其褒寵可

湯思退除權禮部侍郎

朕惟周之禮樂庶事備而治神人和上下莫重于春官  
維時貳卿司是容臺當郊之歲尤慎擇人爾詞華邃精德  
蘊深茂學殖之富見推士林曩由石渠載筆入侍朕閱  
圖書之整而知其有典章練達之識嘉記注之嚴而知  
其有夙夜直清之資肆盼命書升亞宗伯噫一陽大報  
已戒涓休三歲上儀毋忘旃飾懋乃攸績往哉惟寅可

林機除起居舍人

朕觀古之帝王言而為命令動而為法則布在方冊粲然可觀非夫載筆之臣密侍左右從而紀之則何以垂勸戒詔萬世哉以爾儒林之英沈靜寡欲實在東觀有太史氏之長才升之南宮有尚書郎之清望記注之任命汝司焉有舉必書入直螭頭之下在法當從出聯豹尾之中纂修所聞毋替厥守可

孫汝翼除成都府路運副

朕審處羣材遞更劇寄乘輅之吏或剖符而臨帥藩顯  
間之臣或分道而將使指所用雖異均為得人以爾學  
富才通志操廉亮頃由奎府三易外臺蒞事剛明累著  
風績擁麾南夏報政有成惟石門劔閣之名區距荆非  
遠有流馬木牛之舊制於蜀可稽趣駕星車往其護漕  
祇予成命毋憚遠勞可

史才除右諫議大夫

朕稽古又政臨朝聽忠念侍從之臣惟諫大夫實專於

論議而治安之世雖明天子不廢於箴規我得其人登于近列具官某學篤自信行高弗渝譽素聞乎膠庠身幾老于州縣比直諫省屢陳讜言宜陞禁路之華俾服爭臣之首隆寬廣直朕方推延納之誠糾謬繩愆爾尚罄切劘之義懋迪予訓益殫厥心可

魏師遜除侍御史

朝廷類羣才而升處憲臺者必端方之士御史分三院而治位橫榻者稱雄劇之官既遴簡之匪輕亦褒遷之

有序爾論必据正氣能養剛頃絲六察之聯共持乎邦  
法今以副端之望獨糾於官邪踐歷有聞深嘉乃績宜  
進司於柱下益增重於朝端國之紀綱繫爾正而中外  
肅予之耳目繫爾明而賢佞分往惟勉哉毋替厥守可

王珣除湖北運判

部使者之設或總漕計或按祥刑或經理財貨第其能  
者各以次升用人之方朕心庶幾矣爾名臣之胄家學  
未淪自勵其才志乎興利及按漕右吏姦慴焉徒之湖

湘能以靜治輸將之寄命汝恪守詔條毋為民擾可

丘礪除福建運判

閩粵之地東南輿區物夥俗蕃號為劇部其有素官于彼而周知民之利病吏之良否者朕以漕臺之節付之爾儒雅之才由郎歷郡建安之政迨今誦之朕常屬汝以刺舉之權就按一路以財則阜以刑則清命之將輸因其能也官望益重宜思所以裕吾民焉可

湯允恭除都大提舉四川茶馬

衛之駮牝魯之驕皇作詩者美之以其國富而用足也  
國家以茶市馬成憲具在刺舉之任亦繫乎得人朕以  
爾方叱馭遵塗平反一路長才遠用固宜以全蜀之權  
畀之惟嚮于外者無號噉之耗爾之職也其尚勉哉可

張澄知福州

建旄顓閭夙稱可帥之才分虎牧民更懋惟良之績宜  
頒譽命易畀名藩具官某識瑩事幾材周世用總地官  
而濟劇邦有餘財莅天府以擿姦廷無留牒暨膺龍水

之節旋擁洪都之麾五袴之詠已騰三年之計斯最俾  
以六纛鎮于七閩惠愛黎元朕方垂寬大之詔廣宣風  
化爾尚播中和之詩益勵乃勤以承予訓可

張宗元知洪州

朕觀漢時號良二千石者必曰所居民富所去見思蓋  
居者閱累年以因能而職治去者更數郡以易地而惠  
均朕之於帥臣用斯道也具官某履艾之德久矣簪橐  
典藩試之吳門其政清徙之桂林其治靜用之閩粵其



民安今斂此三鎮之惠使致於大江之西俗雖剝輕孰不從化尚務綏撫體吾愛民之心可

李琳除吏部郎官齊旦除駕部郎官劉澈除都官郎官

李泳除比部郎官

勅具官李琳等文昌總庶務列宿分諸曹事任雖殊均為華選朕慎真郎吏考覈羣才欲觀其長預使之攝得於已試然後用之以爾琳心醇行夷明允有守以爾旦風規粹整謹畏自將以爾澈年耆而處已清以爾泳識

邃而慮事審並揚休問假罷中臺久則為真因爾能也  
敏哉敘流品以公飭駕乘以備恪司都隸慎總比計職  
仍其舊命則惟新毋廢成勞以祇茂獎可

程厚除直徽猷閣

樂史采詩第從臣之嘉頌禁庭隸職嚴列聖之寶儲非  
擅美才曷膺優獎以爾心精辭綺學廣聞多項叅鷺羽  
之行嘗典螭坳之記言語妙乎天下智畧湊于朕前自  
違載筆之司益富揆庭之藻奏篇來上雅致可觀爰陞

內閣之華用作名儒之寵勉思端操茂服渙恩可

張子顏子正子仁並除直顯謨閣

朕惟宿將重望以功名自全眷禮不忘往幸其第諸子儼列閭閻焉有嚮儒之風朕甚嘉之西清謨訓之藏中祕圖書之府爾固當寓直乎其間矣六閣之設名器有差顧雖時髦必以序進今茲超授式表異恩勉其操修服我褒寵可

高百之除浙東提舉

兼督兩司外臺所重分使諸道近旬為優自非開敏之才曷副東求之意以爾吏能強濟咸晚之良早以廉稱總茲賈船載錄幹旋之效改陞刺舉之權惟食足貨通則民賴其利惟令行禁止則官修其方恪守彝章往祇寵寄可

楊愿知建康府

瀕江要地金陵標虎踞之雄作屏陪都帥守握麟符之重疇咨宿望允屬時英用煥綸章俾分閭寄具官某職

閱而靜粹材劬而疏通賢路蜚聲蚤踐清華之貫樞廷  
接武久叅宥密之謀自均逸於真祠旋鎮麾於近服承  
流千里治行已孚斂惠一州遠猷未究肆頒書命徙鎮  
鄰藩境列屯營武資於綏附任嚴管鑰仍畀於居留尚  
懋汝為趣承予訓可

章夏除端明殿學士簽書樞密院事

朕惟常德立武事既恢偃革之功守成責儒臣益賴本  
兵之助疇惟邦獻登與政機具官某志端而量夷行潔

而才茂蚤潛心乎大業致策足於要津考之以言責則  
議論諤諤有古諍臣之風付之以憲綱則威聲稜稜得  
中執法之體朕方收天下之兵柄敷七德以靖邦範斗  
中之樞彊斡萬微而齊政輒自南司之峻進陪西府之  
崇簡在朕心式孚衆論雖方隅底定靡勞罇俎之折衝  
而夙夜惟幾當叶廟堂之成算其懋乃德永孚于休

林大鼐除諫議大夫

朕勵精而求治道虛已以聽讜言諫大夫掌議論之官

能為朕別白忠邪指陳得失毅然以言責自任者蓋未嘗不親信而樂從之具官某稟資粹清有匪石之操履位正直有羔羊之風頃由曲臺入踐烏府論事侃侃開吾聰明立三院之中既善持乎綱憲進七人之首將近取於箴規其思盡忠輔予不逮

吳秉信除右文殿修撰知常州

朕以公恕之道待臣下思其始則必欲全於終罹於咎者猶或錫之福自一命以上予奪不敢輕也況吾侍從

之列乎具官某以儒學之舊致身近班載筆演綸皆所  
更踐茲又進天官之貳亦云寵矣贊書未下已投佩而  
去之質於人言朕所深惜然人之才知亦各有長苟適  
於用其可以請廢哉俾聯書殿之華付以專城之寄往  
思自効並勉後圖

凌景夏除直龍圖閣知信州

事君者不擇事而安聯簪索於中則有論思之責擁轡  
蓋於外則為師帥之官出處雖殊其任一也爾以儒業



自奮踐揚清華固嘗繇郎曹紆郡紱矣肆茲名還洵致  
法從今又以被劾補外尚思有以勉之峻直龍圖用為  
爾寵往祇朕命毋貳乃心可

海陵集卷十三

欽定四庫全書

海陵集卷十四

宋 周麟之 撰

外制

湯鵬舉兼侍讀

朕仰三朝之大訓實萬世之宏規我祖詒厥子孫罔敢  
失墜其政布在方冊皆可舉行爰命耆儒以時進讀具  
官某以直道扶世以正色立朝多聞極乎高明浩養全

乎剛大既踐烏府振紀綱於頽弊之餘宜登清華抗議  
論於顧問之際將從容而諮訪益啟迪於聰明爾固嘗  
告乃后之嘉猷更期有補朕因得鑒先王之成憲庶幾  
無愆尚罄忠言以裨治道

楊椿兼侍講

朕聽朝之暇玩意羣經尊聖道以表章斯文咨儒臣以  
折中其義邇英密侍尤慎選掄具官某早以粹文傑出  
乎萬人之上通經博古籍甚英聲今由蓬山進位持橐

夫以投戈息馬之時而任武部以崇化厲賢之地而兼師儒勸講經帷無以易汝爾其探索六義之旨發明三百篇之辭以助成溫柔敦厚之教朕所望也爾惟懋哉

楊傑除祕書少監

朕蒐輯遺文紹聞祕府念圖書既備宜惟號羣玉之山而英俊所儲又以比藝林之圃惟能啟發篇章而充其所未見以是涵養器業而用之無不宜顧方多士之朋來孰非一時之遴選以爾志學無勸業儒有聞凡所踐

揚莫匪清望昔已寓石渠之直今猶分星省之光宜即  
仙蓬遂陞少令爾其廣聞見以藝文之富究淵源於宏  
達之羣使仕學之兼優則聲實之彌茂往欽是訓期稱  
所蒙

霍蟲除直寶文閣知潭州

潭為南國一都會介長江上游水陸輻湊素號鉅鎮近  
時置帥尤慎地望益雄如秉旄鉞參樞機之臣皆嘗相  
繼在此選今也久缺甚難其人以爾有閎辨通敏兼人

之才為當世撥煩吏游刃所至目無全牛頃由郎曹踐  
歷卿寺將使指於外類能勸功樂進不避劇不容奸今  
畿右之政猶爾也凡所條奏切於為民授之虎符才望  
咸允夫長沙距所部為近而延閣比曩職益高朕故併  
以是命之母乏兵農毋擾獄市明不在於苛察嚴不在  
於峻文介不在於崖行三者爾所長也尚當慎之以抑  
其過典聽朕訓往即撫綏之功

熊彥詩除西京運判

朕以畿右諸郡創殘歲深民雖息肩未洽於澤今欲復  
戶口闢田野使守令各盡心悉力拊摩之亦必賴部刺  
史班宣六條省察治狀然其所隸不過數城時方省員  
一漕臺足辦吾事以爾儒學吏治號為兼通才刃恢然  
見於江夏洗手奉職規模一新剔其類紛補弊苴漏郡  
事既飭民情亦紓宜改命於臺使觀風於鄰部爾當戒  
疆場之吏毋生事諭師帥之官毋擾民惟招徠逋亡惟  
存問疾苦斯乃計最往其懋功



金安節除大理少卿

刑所以弼五教之敷獄所以司萬民之命要其效則如  
臯陶之淑問期于無刑得其情則雖子路之片言可以  
折獄念此久矣非古之所謂賢大理者孰能副朕意哉  
爾鯁亮廉明夙有清操頃嘗執御史之簡立仗下糾非  
法朕固已識其人矣久去軒陸安於山林比分左符復  
攬轡于畿右廷尉之任汝誠其人夫吏端則刑清法立  
則民慈益慎乃辟往哉惟欽可

張綱除資政殿學士知婺州

舊德為元龜時乃格王之丕訓故國非喬木視吾當世之  
老臣雖或去而莫留亦所臨而增重宜極股肱之遇  
式昭體貌之隆具官某持身安和立德敦大學皆本乎  
六藝疏通知遠而深於書文自成乎一家左右逢原而  
造於道早魁俊造之選徧歷清華之塗服兩禁論思之  
勞久叅聯於簪橐行二疏止足之計嘗息駕於林丘屬  
當更化之初惟務招賢之廣特起壽雋以尊公朝昔授

佩而去甘泉已高風之可仰及鳴騶而出幽谷斯衆望  
之咸歸擢自從班入陪機政以妙用彌縫之密知期年  
協贊之多俄游貢於奏章至力辭於著位溫言加勞雅  
志莫回既俯徇於懇祈仍曲加於眷禮是用通籍祕殿  
剖符近藩尚冀聞君陳之嘉猷入告于內亦徒得汲黯  
之重望卧治斯民示予有志於貪賢想爾未忘於報國  
儻能共理何異在廷

陳康伯除叅知政事

朕延登弼諧協贊治道謂天下本無事莫如有德之能  
安惟國人皆曰賢斯見真材之可用槩其僉論得於在  
廷具官某負博達之材蘊深湛之量心平不競每休焉  
如有容宇定而光蓋淵乎其似道早陪鸞鷲之武已識  
棟梁之姿去國十年以復來而望重劾官六列以素宦  
而識明洊升喉舌之司益懋經綸之業覽條綱之備舉  
嘉品覈之咸精施設有方靡不合中和之度刺裁多事  
未嘗見喜溫之容矧惟大官實冠卿位周總以建邦之

典唐兼於議政之臣宜副邦瞻遂躋政路噫朕欲以更  
化善治正猶琴瑟之張爾尚其協恭和衷毋替股肱之  
喜往祇譽命共卽康功

王師心除吏部尚書

中臺總庶務之綱選部据羣材之會尚鑒裁則人為重  
故晉人以一字被才論資格而法益繁故唐法以三銓  
分注朕襲用前制疇咨列卿必欲任賢而使能庶幾興  
滯而補弊具官某恭寬容物敏辨過人美矣器資雖銅

玉蒙金而莫掩恢然才刃當盤根錯節而有餘比以甘泉之舊人起於荆水之遐服訪論議則樂聞其侃侃考事功則詳試於多多委以版曹不逐利於理財之末升于瑣闥不邀名於批勅之間惟宿望之甚高故數遷而靡吝宜付天官之治遂登常伯之尊夫七司之繁條章莫不備具四選之會流品欲無混淆惟疏通可以振滯淹惟詳審可以察姦弊朕不多訓汝其懋功

賀允中除給事中

惟時論駁之司實闕政事之本漢開青瑣有夕拜之舊  
儀唐隸鸞臺有塗歸之故事屬此虛位艱於用人自非  
得直諒剛明之才何以為論思獻納之助具官某好古  
博雅奉身清高卓爾多聞蓋先朝館閣之士浩然遠引  
為累歲山林之遊知否泰之有時故卷舒而自得遂以  
拔茅之卜副予仄席之求既回翔乎侍從之班講摩是  
賴能被飾我禮文之事清直無渝茲有望於老成顧豈  
容於久次宜峻甘泉之秩遂升左省之聯朕方樂受蓋

言具修廢事凡詔勅之不便能勿憚于封還則朝廷之所行舉皆協于公議朕所期者爾枕念哉

羅孝芬除祕書丞

學所以為忠孝善事其親者必善事其君人雖難知行實可考頃爾之居州里也有母眉壽過於期頤躬營甘旨左右就養不肯一日屑屑從吏役而違膝下之奉終始弗懈逾二十年風槩凜然一方畏慕是其素志豈苟為高者朕固知其為忠孝人也今朝廷蒐聘賢雋乃得



爾于薦士之章義當移忠可以仕矣然則舉者謂爾氣  
節剛正學術深醇其皆本諸此乎名見之初丞于中祕  
矯薄厲俗予將汝觀可

劉卓除起居郎

古者左右史分記言動若書之與春秋莫得而一也今  
其官次雖各隸兩省然入侍禁廷則遞為之直退操汗  
簡則迭為之書與古少異矣至于從容造前時得以論  
天下之事則其為職親望重又豈止記注而已也以爾

學識淵源士之掄魁言揚于朝累踐華貫比以才望貳于蓬山一時大雅之羣無不浩然歸重夫以石渠之領袖視螭陛之班聯其序列固不等也然而秉筆赤墀下實綴吾侍從之臣朕親拔老成期以自近而仍使資高者居此選其意顧不厚哉勿替論思將觀所守

王晞亮除左司郎官黃祖舜除右司郎官

文昌天府庶務之淵分之以六宮而總之於宰士凡自部而上之省者無不闕焉蓋所以佐丞轄而理曹事自

昔多以周材之敏識望實俱稱者為之今吾尚書郎如  
晞亮之精詳審明祖舜之爽達彊濟皆宿儒也或久與  
典選或屈于司儲爰嘉已試之能並正彌綸之任夫省  
闈乃要地都官為劇司惟得其要在於提綱之間則居  
其劇無不迎刃而解往承厥敘益究汝心

康執權落致仕知泉州

國莫先於貴老治尤急於綏民念八十者常珍當具高  
年之禮而二千石共理必圖舊德之人雖已投簪尚堪

懷綬具官某材全肅又學造精微早魁上舍之羣英晚  
作西清之故老宣勞兩禁歷更吾道之艱難謝事十年  
猶想是翁之矍鑠朕固不忘於黃髮爾寧無意於蒼生  
宜趣駕於安車姑就頤於燕寢昔散金娛老欲終廣受  
之高今分虎牧民佇上龔黃之最往攄素蘊益懋來勤

陳正同權刑部侍郎

昔臧哀伯以德諫君聞之者固知其有後孫叔敖盡忠  
為上思之者猶幸其復生惟效見於仁人之言故寵加

乎賢者之嗣朕慨然遺直詢求老成得此典刑之英用  
為名節之勸具官某器質端亮材猷粹清父教之忠恪  
守詩書之遺訓世濟其美多道臺閣之舊章昔爾先人  
時惟正士攘袂抗議極治亂之本原著書立言辨君臣  
之名分每有犯而無隱今雖死而不忘幽光既發於九  
原公論不移於千載賞里革而藏斷畧方見其心愛名  
公而及甘棠矧惟其子茲久勞於省屬宜進貳於卿聯  
惟能持公平於三尺之間斯可盡忠孝於一門之內往

祇願敘勿隕其聲

朱倬除右正言

朕挈天下之賢雋而材諸位未有不由推轂進者曾何  
疎遠之間哉公也惟一時諫官御史居耳目之寄必朕  
所親擢比無非祖宗之意亦公也觀本朝故事自雍熙  
改拾遺舊稱而明道有宸選之諭踐斯職者或自山林  
起或以下次升舉出于人主自擇蓋不如是不足以聳  
動四方之觀聽而託之以至公焉如爾之鯁亮純誠不

苟求于世人罕知者而朕實知之故昔之分守符而行  
則留汝為成均之助今之將使指於外則命汝以言責  
之官皆於朕辭聞爾謹論深惜其去不旋踵而改除惟  
古諍臣厥蹟可考爾尚無隱禕予聰明

周綰除國子祭酒

朕衅甲敦儒崇建黌舍勸學以為天下先十數年于茲  
矣今園冠莪如大裾襜如閭閻乎其中者日益衆欲使  
之業不荒于嬉行不毀于隨則必有諸老先生相與倡

率而作成之此所謂四海淵源者也以爾學贍文蔚今  
之耆儒自初劾官卓爾有立雖事功之所閱歷不過於  
惠一州肅一路而辭華之敏妙行實之方嚴見稱於士  
大夫久矣比自外臺入對朕始識之喟然有見晚之歎  
肆予命爾掌教成均為師儒之長朕方兼兩科以造士  
設經者戒其迂體物者尚其則爾惟正訓誘之無不迪  
爾惟明考閱之無不精往其念哉以稱朕意

葉義問除殿中侍御史



憲府紀綱之地自昔居殿內糾非法者必以二御史為之蓋欲廣視聽尊朝廷也朕自厲精政事延見羣材開納讜論得其人久矣奈何使其誣于外乎爾以高明挺拔之資穎出土類持論据正直聲隱然自其奮身固已有敢言之氣而頡頏州縣義不苟求名對之初一見嘉歎朕以其容臺之席未溫而星軺已駕也今名歸而用之貳于臺端蔽自朕志夫當正色之地而處盡言之朝遇其時如鵬鷖之在秋天見無禮如鷹鷂之逐鳥雀古

有明訓爾惟懋哉

曾幾除祕書少監

東壁主天下圖書古之典星者又以是為國家多君子之應今吾中祕篇籍畧備棟宇之麗同於木天真所謂道家蓬萊山也而比年四方秀文之士接武於其中瀛州之目幾充焉必得耆儒為之領袖垂象之著明於此占之以爾齒戢行尊心精辭綺名在館閣垂四十年識行簡之舊文習麟臺之故事昔雖久勞於外人皆謂之

行祕書再召而來聲猷愈偉俾以少令儀於英躔朕欲  
哀遺編於五厄之餘追勝觀於三閣之富訂魯魚之譌  
謬別朱紫之混淆爾其繼安世而誦七書效世南而寫  
逸傳助我文治而惟汝能可

凌哲除權吏部侍郎

能官人之道其要本於知人善論事之臣不如措諸行  
事朕循名而責實納言以試功得茲通務之才屬以典  
銓之寄具官某直方有守閤侃自將人即而溫渾然不

見圭角躬行所學叩之皆有淵源比由憲府之聯旋歷  
爭臣之列去邪指佞坐肅百僚之師師陳善納忠喜聞  
一士之諤諤每於議論之際得爾鑒裁之公念言責不  
可以久勞況材能當見于實用宜進升于禁路俾分治  
於天官夫貳卿之華左選惟劇然姦吏巧舞足以致有  
司之疑則繁文多拘或至為仕者之病茲乃前弊爾嘗  
具陳其殫汝心以辨邦治可

辛次膺除給事中

朕載整頽綱茂凝庶績念東臺之要地開萬務以尤嚴  
如黃閨之從臣殆十年而不置必得直方之彥冀聞封  
駁之公具官某業履粹夷器資端亮昔焚諫草論事有  
爭臣之風晚卧隱廬持身得君子之守尚想心存乎魏  
闕亦知名震于京師為爾特招副予虛佇屈從近郡之  
師帥來作清朝之羽儀雖春官見已試之才未攄素蘊  
而夕瑣乃久虛之席其遂延登惟故事之有塗歸惟前  
人之有批勅往振斯職用殫爾心

陳康伯兼侍讀

朕順考古道率由舊章深惟政化之原具載祖宗之訓  
迄今二百載更列聖以遵承凡此三十篇賴純儒而闡  
繹具官某才兼數器識洞羣書允矣典銓之公聿為持  
橐之舊力行所學豈惟世務之博通德裕乃身蓋亦前  
言之多識方與修於寶牒宜入侍於金華念唐宗讀政  
要之書朕靡忘於慨慕而賈誼達國家之體爾實副于  
疇咨尚告謀猷庶揚光烈

賀允中兼侍講


朕儲精萬務之餘玩意六經之奧謂春秋乃天子事既深窮乎約史之辭惟好惡與聖人同又旁考於素臣之傳孰通大義茲得名儒具官某抱淵英之才躬卓約之守燃有華望儀于禁涂以春官貳卿方總理文之事於太史實錄備觀學識之長宜與詳延俾參勸講朕欲識其大者簡二傳以紆異端爾尚曲而暢之推五體以尋新意勉茲紬繹助我緝熙

姚仲除龍神衛四廂都指揮使御前諸軍都統制  
知興元府

安邊而擇良將蓋惟務於戢戈承德以撫成師茲莫嚴  
於謀帥乃瞻藩宣之舊夙高牧御之能用趣責於恩縉  
俾進顯于閭制具官某忠謀自奮勇略無前屹然飛將  
之才兼有蓋臣之節塞旗數矣身更矢石之勞結眊先  
之氣壓虎貔之旅自師干之偃息勤疆瑣之填臨賦政  
累年已袴襦之可詠總戎數郡亦桴鼓之不鳴求念長



才宜膺重寄亟拜華於廂部肆改命於轅門皂蓋朱襹  
易鎮漢中之會伍符尺籍分提蜀道之屯萃此寵光寬  
吾憂顧噫萬福之威聲久著諒草木之知名臨淮之號  
令一新想旌旗之動色惟綏懷可以惠一路惟慎重可  
以律三軍若時壯猷奚俟多訓



海陵集卷十四

欽定四庫全書

集部  
海陵集卷十五  
六

詳校官庶吉士<sub>臣</sub>李如筠

主事<sub>臣</sub>呂雲棟覆勘

總校官編修<sub>臣</sub>王燕緒

校對官編修<sub>臣</sub>盧 遂

謄錄監生<sub>臣</sub>王爾熙

欽定四庫全書

海陵集卷十五

宋 周麟之 撰

外制

凌哲除敷文閣待制知台州

備西清之訪問華閣萃乎先猷列東輔之蕃宣赤城號  
為嘉郡非賢勞之茂著曷寵數之兼隆具官某奮自膠  
庠任更臺諫論事疊疊無非仁者之用心在朝閭閻可

見吉人之為善自昇典銓之劇仍嘉勸講之勤遽此引  
痾祈於補外念素懷之莫奪宜眷禮之彌優乃寓之於  
次對之清班而付之以承流之重寄得陳力就列之義  
宜有令名當治民考功之時勉為善政其體朕意益殫  
女為可

王師心除顯謨閣直學士知紹興府

天下之事無內外設官皆所以為民人臣之心無去留  
立義不忘於體國肆茲謀帥首及從班具官某善積諸

身識明於內舊聯持橐蓋去朝者十餘年累易藩符能  
敷惠於數千里洎復還於近署每入告於嘉猷率屬天  
官事悉從於寬厚侍言帝幙學有助於緝熙念夫勞逸  
均則出入俱榮表裏一則重輕各得爰遵近制式勸羣  
工矧六閣之在西清此新儲於祖訓而七州之連東輔  
茲密邇於行都加寓直之崇名表殿邦之重寄益享靜  
治以對優恩

賀允中除權吏部尚書

銓曹之設其始以鑒裁用人近世相沿蓋專以法令從事雖品覈具存於成憲而推行實繫於得賢要須敏健之才痛革依違之弊具官某持論公正稟資清通壯歲垂車久遂山林之志暮年結綬亟陪簪橐之游自擢實於瑣闥數封還於詔令每觀勅尾之議曾不吐剛而茹柔少露胸中之竒必能揚清而激濁惟是六官之長實兼兩選之繁命汝以遷庶乎其稱爾既明而通法意固無患於拘牽爾能直而杜吏欺必不容其巧舞益殫所

蘊用副予知可

沈介除祕書少監

石渠典籍之府東觀道家之山兩漢名儒未見不由此而進者矧今少令領袖羣英優游未天馳騁文囿得入之盛奎壁有光以爾策名兩科學瞻辭蔚序于中祕今十五年雖久在外以枉其才然器識之所以涵養者日益富監貳既闕莫如汝宜其釋左符遂還清貫況惟茲職舊所攝承與修當代之信書兼纂前朝之大訓史家



凡例無不習知益恢遠圖副予褒擢之寵可

王剛中除中書舍人

中書為政事之原西掖極儒臣之選豈惟敷文華以藻飾一代蓋欲明號令以鼓舞萬民正須潤色之才共服演綸之地具官某富有用之學挺不羣之姿發策而取文科固已應唐詞人之號讀書而通雅誥是又兼楚左史之能既踐歷於螭階久攝承於鳳閣念已權者不試而命有故事之具存惟並建則各伸所長俾贊書之分

掌矧此國體繫於王言要當追三代之風使文章煥焉  
可述斯能聳四方之聽若卜筮罔不是孚往輯爾辭庶  
裨予治可

黃中除國子司業

三代之學皆本於明人倫漢唐右文惟以飾治具本朝  
教養之法甚備賢能接武出其中奕世用之逮今不匱  
作成之效如此豈有它哉一師儒苟得其人可以首四  
方而善風化爾學問淵粹端莊有常曩魁俊科屈處第

二綴英游於館閣之上人莫得而親疎自遷郎闈久攝  
成均之貳善誘不倦成模可觀今命即真是為因任爾  
能明義訓之學如穎達勸忠孝之道如陽城使諸生業  
精行成爾則與有無窮之聞可

周必大試中詞學循一資

國家自紹聖以來設詞學一科蒐取異能之士行之既  
久所得為多肆朕中興斯文益振今試于春官者數十  
輩而爾以粹文獨與斯選拔尤若此陞秩匪褒姑游津

宮以踈甄擢可

洪遵除起居郎

昔楚左史倚相能讀三墳五典八索九丘見取於當時  
著名於後世然則載筆之任固不止於書言動昭法誠  
亦貴乎博識而多聞也爾頃以詞學之茂稱首殊科兩  
登蓬山衆謂淹久自承宣室之名即入直乎第二螭之  
傍持論造前多所宏益茲命序進隸于東臺夫記言之  
司是將專以古帝王之書為法也典謨訓誥厥則具存

纂修所聞母易而守可

張孝祥除起居舍人

唐人有言左右史當用第一流蓋以其濡筆螭坳出入侍從羣才識拔之始必以是為要塗苟非其人不在茲選爾才業識度秀於妙齡頃魁詞科朕所親擢加以老成解事名未試而實已孚溥涵道山內益汪肆遂由南宮賤奏之任躡陞西掖記註之司夫用士者欲各隨其材而懷材者貴有適於用朕今命汝庶兩得之往迪訓

辭毋懈于位可

葉義問除侍御史

柏府分三院而柱下史為雄劇之官故簪筆以別其儀  
橫榻以異其位給駟以嚴其體歷考前代不輕授人在  
於公朝推擇尤慎以爾鯁亮清恪國之勁臣峩冠赤墀  
中外咸肅凡正衙之所論與造膝之所陳每有以糾逆  
官邪扶持國是行矣閱歲納忠為多今陞臺端用增重  
于風憲之地昔有功授職而聞之者相賀溫造執奏而

遇之者膽落爾其母避彊禦母畏高明母有隱而不告  
朕所望者往殫厥心可

趙令報除權戶部侍郎

漢九卿之高位缺則選諸循良唐三省之從臣間亦求  
之督刺朕參用前制作興庶工今得人於輔藩俾貳事  
于計部具官某材力彊濟器資銳明以帝王之本支而  
躬寒素之風以公子之信厚而蘊疏通之畧累官于外  
厥績有聞五駕軺車每應條而輒舉再分符竹茲游刃

以無勞與其借洪河之潤於近封孰若觀利器之施於  
繁委乃召從於帥閫俾入掌於民曹況嘗通延閣之班  
可使蹈禁途之轍若夫總國家之大計究財貨之本原  
倉儲斂散之權錢幣重輕之制朕不深告爾皆習知往  
其善謀副我虛佇可

何溥除左正言

臺諫皆吾耳目所寄也然御史糾官邪助風憲為肅政  
之司諫官裨主失盡箴規有責難之義兩塗雖異任用



則均以爾器資高明問學醇正擢在臺察歲將再周端  
慎自居恬於榮進望實之懿久而益孚今升之於七人  
之聯屬汝以諫爭之事夫君臣之際言合惟艱下焉欲  
竭智而盡公上焉貴博觀而虛受漢文帝稱毋甚高論  
朕則無所不容魏鄭公謂願為良臣爾其以此自勉可  
謝並除國子錄程大昌除太學正

國家興膠庠以造天下之士三年大比決科者每不下  
數十人幾馬羣之遂空蓋雖未之立見朕方尊尚經術

衆建師儒固當求學校之舊行藝之優者為之亦庶乎  
多士之率服也知爾芷之明於禮爾大昌之深於書久  
游賢闕聲實俱劬糾正之任莫如汝宜夫治人者以身  
先得道者以心授作成在此惟明惟公可

唐堯封史浩並除太學博士

朕勸學勵賢恢張文教令四方肄業之士合經術詞賦  
為一科惟時膠庠實號首善師儒之選尤慎擇人以爾  
堯封抱藝不羣累更侯泮以爾浩績文甚力舊服賢闕

是能兼二者之長可以課諸生之習夫經為至治之法  
賦亦古詩之流通經者欲中道而從容能賦者貴體物  
而瀏亮士之器識於此可觀往其究心訓迪毋倦可

任古除監察御史

公道之在天下譬若權衡然必得正人相須焉柏臺之  
設繫此匪輕惟衆正之咸歸則大公之克舉爾之志操  
朕嘗於公論得之自為小官弗憚大吏其宰百里以身  
為民終不肯枉道而事人可與居今而行古頃時召對

朕固器之憲僚缺員無以易汝惟庶事之一於正惟羣  
言之槩以公助我紀綱勿墮其守可

辛次膺差知泉州

國之從臣中外一體入則告嘉猷于后為百辟之羽儀  
出則下膏澤於民作四方之藩翰委任之意其重惟均  
具官某瞻智達材施於有政輔之以廉隅而志不詘持  
之以學問而論不阿頃自隱廬召還禁路進退之際不  
欺于心今起之於閒館之居授爾以專城之寄念彼閩

粵泉為大州獄市浩繁正須善治芟棠以辨民訟酌水以澄吏姦爾皆優為朕不多告可

呂廣問除江東提舉

士君子懷材抱藝則必自有所守顧豈以仕已貳其心哉質之公言朕不終弃爾之為郎也才諳用其去也以無罪行再登于朝前後一轍此時論之所未喻固宜有以詳試之大江之東往將使指凡邦儲之斂散與貨政之懋遷爾能究心亦足自見可

徐林除權戶部侍郎

禹疇用政足食為之先周典建官理財居其半矧是版  
曹之設實惟邦計之專非深知乎本末源流必自困于  
簿書期會不有能者孰堪付之具官某敏健兼人精明  
博物以儒選而有適時之用以經通而得富國之方昔  
同琬琰之就煨塵重嗟中廢今若驂騑之開道路益見  
老成與其跼遠用於他司孰若試實才於劇部宜頒新  
命俾易貳卿大夫不能貧在乎彊本而節用惟國無妄

費則不傷財而害民朕方深信於仁賢汝尚均齊於調  
度益思善後務究嘉猷可

黃章除國子監簿

今之占一善名一藝者苟有位于朝皆足以自見惟在  
乎隨所用而安之耳憲府之屬爾嘗為之服勞簿書每  
克自力今又以庠序之舊改命于成均周旋師儒之間  
典掌行藝之籍爾處于此必能安焉往其勉之益慎厥  
止可

沈樞除御史臺簿

國之紀綱屬在憲府官無小大皆欲以蕪亮有守之士  
為之儲才於茲其用固有序也爾以學業之茂安於所  
守而達於所知延見昕朝首告朕以君子小人之說夫  
二者治道之要也爾能知之足以為臺屬矣鈎稽之任  
其尚勉哉可

陳良翰除江東提刑

凡抱功修職之吏必善用其所長如扁之斲輪良之執



鞞非智專者不能精也況乎典庶獄于外觀五刑之中  
敷求吉人意固有在爾之為吾理官也練習文法決疑  
以審請讞以明踐更職司貳于廷尉是嘗處天下平矣  
今付汝以攬轡之任責汝以平反之功蓋因其能敷惠  
一路當使彤幃問俗之意不減丹筆泣囚之時往哉惟  
欽咸庶中正可

施鉅除知洪州

江山作鎮有如翼軫之區岳牧用人無若股肱之舊蓋

事權之所寄必資望之兼崇疇厥帥才命之書贊具官  
某風猷廉勁識度粹夷由清路以奮飛登政塗而勵翼  
自安常操如松竹之貫四時沆保令圖如鴻鵠之舉千  
里旋授虎符之寄往勤桂管之行海道肅清邊隅綏靖  
念賢人之在遠亦既久勞嘉善政之有成宜從近徙眷  
惟大府實控雄藩自非長才豈能兼濟臨之以賈父之威  
吏焉敢飯濟之以廉君之惠民孰無襦往輯爾庸用承  
詔訓可

蔣瓌除敷文閣待制

爵祿天下之砥石王者所以厲世磨鈍朕未嘗輕予人  
也況內閣之邃先猷所藏寵職高華列於從橐今將以  
為二千石共理之勸且見朕愛民之心因此序并庶乎  
其可具官某儒胄之懿藝兼於人乘軺効官閱歷二紀  
頃固嘗領轉輸於近甸典浩穰於行都游刃之餘老而  
彌壯顧蘇臺吾股肱郡方倚汝以治之燕衛森凝事能  
趣辨吏最之賞夫豈汝遺由祕殿纂修之聯陟西清次

對之選茲為異數益懋而承可

凌景夏就差知襄陽府

自列郡而升帥府非二千石之有風績者朕不以虎符  
畀之爾頃自綸闈分麾出守清才雅望卓然與俗吏不  
同民謠流聞政績登最宜有以褒表治效用勸師帥之  
官眷惟襄陽實號方面跨對楚沔今為邊衝非信義不  
足以安遠人非寬仁不足以振疲俗命爾移牧為予干  
城往頒詔條克荷優寄可

周操都絮並除吏部郎官季南壽除考功郎官張  
孝祥除禮部郎官

中臺號政本六屬分郎闡吏禮二曹尤為高選朕厲精  
庶務思有實才官人之方先視其攝及此試可從而類  
升蓋操也以積學師賢闡絮也以通材貳工監南壽辭  
林之秀孝祥舉首之英久在石渠校讐祕籍今並以兼  
官之舊錫命而為真典銓者當兩選之繁考績者摺七  
司之會隸南宮者有舍人之目各踐厥次毋墮爾成可

楊椿除給事中

東省之為要地尤重設官夕郎之在從班蓋專論事念  
庶政之方飭猶舊負之靡充今當並建於老成使得相  
參而平奏具官某蘊識端亮持身直溫故郡多賢繼西  
蜀之諸老先朝取士冠南宮之萬人自再歷於英躔亦  
久儀於禁路雖武部掌七兵之事能濟以文而經帷陳  
六義之辭必歸於正籍此論思之力揚于封駁之司惟  
朝廷治亂之端在命令罷行之際知體者志其大善謀

者圖于初往能慎思庶有忠益可

周執羔復祕閣修撰改差知池州

今之士大夫以帥守入蜀者朕未嘗不念其道塗之邈等其歲月之勞或因任以數遷或曲從而近徒皆有恩意勸趨事功安其止而榮其歸庶幾乎待下之道盡也以爾儒學之懿長於治民羽儀中朝嘗列從橐起自閒退分子左符轍環四川綿歷三郡茲既以便親之請改命而言旋寵之以石渠譔次之名優之以粉社鄰邦之

寄亟承褒渥益盡乃心可

華顛除司農寺丞余良弼除將作監丞

寺監設丞叅釐衆務況九扈之為農正五工之屬匠卿  
必得其人相須乃濟今爾顛以序而進厥位由才業之  
可稱爾良弼自外而登于朝亦器能之堪用夫堯以稷  
官為重而周惟事典至繁先王立政之規非吾儒不能  
知也朕所望者爾毋不祇可

張燾除端明殿學士依舊知建康府



漢褒循吏之治或拜爵於通侯唐寵守藩之臣至疏恩於便殿矧茲留鑰之重地粵有禁塗之舊人既治績之彰聞宜徽章之特賁具官某精忠自信敏識多通才猷久著於從班事任累更於方面二十年持橐之望雖寢遠於本朝數千里叱馭而驅嘗有功於全蜀洎投閒而抗志能秉摺以全身迨予庶政之更付以陪都之寄澄清獄市本齊相之無為鎮撫軍民亦蕭公之是將謂牧人御衆茲有以善其職則增秩賜金不足以疇其庸爰

加祕殿之新班式表西清之故老噫朕誠倚注不忘曳履之聲民願借留每有攀轅之志姑安舊服庶協羣情尚深體於予衷益懋揚於乃績可

陳誠之除知樞密院事

國家有常德之輔可與立武而保邦君子有先見之明故能研幾以成務用人惟其若是當世莫不安之詎厥在廷得於已試具官某風度凝遠器資靖深當大廷發策之初首講明於長算在禁路服勞之久每涵養於壯

猷顯然進退之間綽有中和之度時方更化再持橐以  
還朝事不辭難三抗旌而出使遂自禁林之邃入陪機  
筦之崇按疆外之清夷協幄中之慎密當同寅而心不  
貳處獨任而才有餘爰稽衆論之公式畀元樞之命噫  
仲尼有文事武備蓋此道之本同子房無智名勇功宜  
斯人之是繼往祇予訓益盡乃心可

程臨知夔州

雲安控三峽之險蜀孔道也九郡四軍監皆總於帥臣

惟望實之素孚則事權之增重求之最籍今得其人以爾果達之才老於吏事剖符乘傳往來乎楚漢之郊領利路之轉輸鎮益州之都會夔之屬部舊亦按臨閭制既虛無以易汝朕欲使內外均重如權衡之平小大相維致藩屏之固爾其謹視民卒宏宣詔條予訓是承往勤綏馭可

王綸除同知樞密院事

朕惟天下無事尤宜致慎於萬幾賢人在朝固可折衝

於千里乃眷本兵之地仍當偃武之時方用德以為先  
必同寅而有助具官某懿文行遠沈識造微雖蚤以辭  
華結朕知而實以器業負時望學有所守自期君子之  
躬行知無不言蓋得古人之遺直嘗獨掌禁林之大冊  
且備聞經幄之嘉猷念初服於從班即薰承於密旨以  
周慎固弭兵之定議以嚴明整經武之舊規僉曰老成  
久茲詳試俾自冬卿之貳進陪右府之嚴精神所加中  
外咸屬噫夙夜基宥密之命朕不敢康道德成安強之

威爾其無懈益懋憲邦之畧共圖康世之功可

海陵集卷十五

欽定四庫全書

海陵集卷十六

宋 周麟之 撰

外制

孫道夫除權禮部侍郎

虞舜命九官蓋急賢之為務伯夷典三禮惟熙績之是圖朕為官而擇人本禮以成政思得貳卿之俊率循往古之規具官某挺拔不羣疏通無滯辭華服衆本兩學



之舊儒議論過人實四川之名士久矣蓬山之引去復  
茲省戶之來歸寘在月卿不愧容臺之陟出為星使有  
嘉沃轡之還既具著於顯勞宜亟膺于褒擢載念當郊  
之歲尤資掌禮之臣維春官修頌祇之書必有以旰飾  
舊典維司樂序雲門之舞必有以燕娛靈心勉蒐閱於  
上儀助涓成於熙事往祇予訓惟既厥心可

魏良臣知宣州

朝廷待執政之舊猶吾股肱牧守視諸侯之雄為國藩

輔茲圖雋望用畀名城既僉論之咸孚宜贊書之是錫  
具官某才資果達志尚方嚴操修不變於險夷出處屢  
更於閒劇頃持橐以居外首賜環而造朝擢在政塗整  
頽綱而甚力恢然才刃掃宿弊以無留方須善治之興  
遽有均勞之請居是邦而聞政事屬此剖符之虛起於  
家而見吏民不殊懷綬之寵徒得君重亦便爾私意汲  
黯在朝昔固多獻納之助召公維翰今必有蕃宣之勞  
往俟政成毋忘猷告可

王師心除給事中

臺閣從臣尤重瑣闥之拜朝廷庶務必關書牘之嚴自  
非平奏之才曷允至公之論爰咨在位今得其人具官  
某雅亮不羣清純有守早以俊林之譽揚于禁路之華  
祇若予工曾遠圖之未究久淹于外宜舊德之過歸幹  
旋雖賴於長材封駁正資於重望朕方考昔賢之餘烈  
悵斯道之久衰觀元素納忠至擅回天之譽若李藩挺  
節尚存批勅之風益脂韋者必致於瘵官而矯訐者又

嫌於邀譽往伸汝志用協予衷可

王綸除工部侍郎兼直學士院

朕考擇羣材分遷從列惟久於劇任必使之居清簡之  
曹惟長於代言故因以畀嚴凝之直孰膺妙選茲屬名  
儒具官某藝了十人身兼數器由待問有殫見洽聞之  
業故結知於高文大冊之間自歸踐於朝班繼獨兼於  
詞禁追歷代坦明之作思若涌泉當大庭播告之修言  
皆破的雖應酬之甚裕亦勤瘁之良多朕今省繕營之

工此則職閒而無事圖翰墨之舊此則禮厚而益親進  
陞荷橐之華仍視玉堂之草往承優眷益懋遠猷可

趙達除中書舍人

司內史之贊書綴甘泉之法從觀昔治朝之盛嘗率用  
於數員念今詞制之繁亦固難於專掌茲得多聞之士  
益從並建之規具官某稟資粹清植操夷澹早魁多士  
得大名而匪虛平視要塗能中立而不倚自紬書於金  
匱旋載筆於螭階有嘉記注之嚴不替論思之益豈惟

勵遂良之志職在守官咸謂有仲舒之文雅宜為詰劾  
嘗攝事備著能稱俾從瑣闥之聯遂正綸闈之直益思  
廣業用副隆知可

徐林除刑部侍郎

刑名本乎禮義法律出于詩書故憲部貳卿之聯雖實  
總乎刑辟然累朝圖任之制亦不專於法家安得通儒  
之才用為祇德之教具官某器資敏辨識慮精明少陪  
三館之游既時親乎求見晚踐九卿之次嘗中廢於非

辜念遠業之素優宜公朝之復用就司府計出領軍儲  
暨茲歸覲之初嘉爾奏陳之悉宜延登於禁路遂入佐  
於秋官庶幾忠信慈惠之師復陳於臬事將使頗類故  
紛之弊盡變於文風往哉惟斂服我攸訓可

唐文若除起居郎王剛中除起居舍人

左右史雖以記言動為職而論思獻納實視從臣地近  
秩清每加遴選故本朝用士多取於蘭臺之英苟非其  
人斷不輕授以爾文若學瞻而詞蔚足以先人以爾剛

中行峻而才清嘗與前列或於石渠有博覽之譽或於蓬觀有佐譔之勤肆茲同陞載筆入侍惟守官以据正惟臨陞以盡恭朕於此除觀汝遠器可

葛立方除吏部侍郎

天官之有大小宰首冠六卿吏部之有文武銓同分兩選思得清通之彥助予綜覈之公具官其學世其家器優於用早儲喬松之令望嘗歷握蘭之顯曹昨去周行久紆雋望迨闢至公之路盡收遺野之賢召以名郎登



于宰士糾違省闈實多詳整之稱結好鄰邦不負光華之遣肆圖嘉績亟寘從班爾能使法行而無阻格之私吏畏而絕姦欺之弊斯乃稱職往其懋功可

蘇簡除直祕閣知廣州

嶺海之陬去朝廷遠矣夫欲究王澤於下達民情於上非吾制閩之臣何望焉然其帥節所臨於南方事無所不統地大體重必求如昔之人所謂正直方嚴中心樂易祇慎所職者為之庶幾乎神人之致喜也今朕選用

有得於世臣之家爾祖在朝以忠讜著聞傳家以端靜  
為法克濟厥美皆曰汝賢貴之寵名用殿南服爾能內  
肅清所部外鎮撫諸蠻使山行海宿不擇所而安公藏  
私蓄不勞力而裕既有得於邊陲之效將無愧于前人  
之光可

榮疑除權戶部侍郎

樂言利者病於不知義善足國者貴乎能富民若時邦  
用之耗登繫爾版曹之濟否具官某老於吏事舊有能

名以三十年附翼之臣久焉留滯凡二千石承流之地  
多所踐揚幸存繇上之善人猶是貞元之朝士徒從輔  
郡入守行都謂下車之可觀意餘刃之未頓是用擢升  
計部叅貳列卿朕方歌南風阜民之詩下西漢敦本之  
詔念經常之有制宜取予之惟時毋規小利而較錐刀  
之微毋事虛文而忘雀鼠之耗當體朕意益殫汝為可  
張偁除知臨安府

漢以千石高第八守長安一時名流類著風績朕於輦

轂之下亦欲參前制而任人故比年或以循吏得遷或以漕臣就徙能者必用不矜于同爾開敏有材深明乎吏道之要頃分郡寄治行卓然來班六條率職唯謹凡屬部有不平之訟及中都有一切之須皆能審決適中趣辦無缺今置之於浩穰之地而責爾以彈壓之功若廣漢之發姦如神若翁歸之絜已自守惟滯囚之亟去惟宿蠹之深懲政或有成朕不汝弃可

李文會除四川安撫制置使兼知成都府

朕求實德以順民心簡重臣而鎮方面念坤維所繫隸帥封者五十四城而魏闕相望經郵置者六千餘里遽聞牧御之缺亟選撫綏之良彼有人焉朕無憂矣具官某疏通知遠端重鎮浮剛柔有以相須文武惟其所用早由要路叅密畫於斗樞之廷晚以舊勞領藩符於井絡之野洊從東路再典大州治貴靜而邊瑣寧政報成而民譽藹雖長沙在近令內徙以誠宜然益部匪輕顧暫虛而不可眷言瀘水之效素得蜀人之心爰就畀於

重權庶俯從於衆望噫叱馭過邛邽之坂想忠臣無憚  
於遄驅好文追齊魯之風念循吏尚存於遺化朕屢下  
寬詔深懷遠氓減科調之繁繫爾宣吾德教列屯戍之  
衆賴爾審其韜鈴往須善最之成克繼前模之美可

趙子瀟除直祕閣兩浙運副

國家分道置使職均地殊如浙之東西實不可以諸路  
比護漕於此則久與其它按部者不同蓋以總兩畿之  
轉輸臨萬乘之都會兼是劇寄委於一司自非彊敏之

才未見其能濟也。以爾警辦嚴恪為時名節，豈惟吾宗之良是亦士大夫之有操守者比。由計部出領兵儲，有如長材焉，得在外。今使爾乘輅近甸，宣布詔條於行闕，有共官給御之須於屬城，有察吏觀民之責。凡是數者，當率其先進，聯中祕之華，來作外臺之表，可。

叅知政事湯鵬舉除知樞密院事

朕復祖宗之舊章，分文武之大柄，以宰臣當代王之事，任不兼於本兵，惟若府得折衝之臣，權實亞乎端揆。我

有明命播于多方具官某才堪憲邦任不枉道以入望  
則素有大臣之風采以政績則類非俗吏之能為自振  
淹於總攬之初即借重於紀綱之地故淫距設障百川  
而東之激濁揚清見一鷄之直上言昏本十翼之義是  
能讀三墳之書爰度師虞用登政路雖可否相濟方觀  
酸假而靡爭然弛張異宜必賴研幾以成務非我壯猷  
之老孰專基命之司噫斗為天之樞機蓋取乎斟酌元  
氣之用武乃世之砭劑當教於膏肓未病之時除戎器



所以戒不虞用真儒所以為無敵往其慎密共此幾康  
可

陳誠之除權禮部侍郎

朕當治定之初新一代之制固已質前聖而無疑交神  
人而咸格惟其庶事之備則有司存至於蕪總情文非  
時通儒孰能與此具官某以淵源之學濟沈粹之資頃  
者為郎祠曹掌教學省皆春官事也而俱以稱職聞茲  
居貳卿其誰曰不可昔舜以典禮命伯夷戒之以夙夜

惟寅直哉惟清何其簡而大也厥今法此以為訓爾其  
法此以守官無俾秩宗專美前古可

韓仲通除權刑部侍郎

朕矜民愚自罹于罪雖不得已而用刑未嘗不為之疚  
懷故屢下欽恤之詔慎擇明允之士示以易避開其自  
新庶幾民協于中刑措不試具官某持心近厚議法以  
情久踐棘司見謂稱職逮為廷尉時無寃民茲擢貳於  
秋官蓋得之於已試昔虞舜有好生之德而臯陶有無

刑之心民用不犯朕甚慕焉爾其往盡乃心益體朕意  
無以古人為不可及可

余堯弼除端明殿學士簽書樞密院事

朕總七德以經武務隆悠久之規飭右符以本兵實贊  
恢宏之治非時俊偉曷副簡求具官某性資端良學力  
超詣中德外見粹然真仁義之人遠業深涵久矣播縉  
紳之譽屬進專于言責果大著于風猷睠惟樞筦之宗  
實亞台衡之重顧今文修武偃雖邊隅無事于折衝然

必德選言揚斯廊廟不數于莫助用掄才于衆俊俾叶  
志于上公茲誠輔弼之聯豈獨兵戎之務惟誠一可以  
參萬化惟忠蓋可以究遠猷其虔乃心以為予訓可

張杞除祕書少監

圖書府蓋國家儲才之地曩者屹然崇成朕既親為觀  
焉而又命近臣以專綱領之任然得隸職其間者多不  
踰數人而監不置少亦已累歲此有以知其選矣以爾  
文行之美表于縉紳比加識擢益有賢譽茲用輟爾于

風憲之地界爾以文字之樂爾能祇率厥屬使皆有以副朕遴選之意則朕豈惟于爾嘉爾屬當亦有以尊顯之其往欽哉無斁可

巫伋兼侍講

昔傅說謂事不師古以克永世匪說攸聞至哉斯言夫古事遠矣欲究觀治忽之所以然捨經何以哉具官某識趣高遠議論純正比以掌諫叅與勸講蓋嘗以虞夏商周之書為朕言之爾位諫大夫以經術入侍為以朕

將取爾說之有補于今者舉而措之天下將以逮古治之盛爾於斯其益勉之可

葛立方除考功員外郎孫仲鼈除司勳員外郎

稽歲閱之淺深覈芳闕之虛實銓曹所以獎吏治明賞典茲者為尤嚴非練達之才不輕畀也以爾立方智識明敏業世其家以爾仲鼈器局宏深譽聞于時頃者召試列于蘭臺積有刊正校讐之勤沉茲兼攝既久綽著能名申命即真僉言惟允宜圖報塞嗣有褒嘉可

湯鵬舉除直顯謨閣差知婺州

九列之重延閣之華委之要邦付之共理凡以重吾民也今宇內無事根柢是先綏之則安擾之則懼過懦則無立過剛則不親爾之公直強明吾有取焉歷劇部更方州典輦轂其勤亦共聞矣寶婺之分地近俗龐畀付不輕也陟之近職以寵爾行爾其勉究所長益務惠養以荷吾寄可

段拂除給事中

政事之出本根實自於西臺審覆之詳營轄常資於左  
省用才惟一平奏尤難必求端良之人以付論駁之事  
具官某早登舍選屢掌泮宮晚貳宗司寢躋法從史筆  
秩宗之久直經帷翰苑之薰華凡所踐揚莫非清要效  
見已試官宜次遷輟自綸闈陞于瑣闥俾出納以之多  
益則教令靡不是孚惟既乃心同歸于治可

敷文閣直學士晁謙之磨勘

考績之法自大夫而上至于朝議員則有定數矣庶官



泥于格而不得進侍從因其最而與之陞茲舊制也具  
官某粹文雅量能世其家頃游禁除蓋嘗以儒學入侍  
屢典藩郡丐閒自願有司校年當以序進秩冠六品亦  
足以增延閣之重而彰官闕之優焉尚樂燕休毋忘明  
陟

知臨安府榮巖職事修舉轉行一官

今之行闕實視上都繫諸夏之本根劇長安之浩穰治  
之急則致烹魚之碎應之緩則失御捍之方二者罔中

鮮能有濟惟爾以幹方之舊詳練而通事幾精明而有  
風采自二千石高第八守于茲不數月間鋤弊剔蠹舉  
有可觀者廂有官而都市肅夜無警而比閭安浚湖而  
水利修除道而徑塗坦凡此實惠吾民願之匪棘匪舒  
不勞而辦焉得不舉增秩之科示勸功之意選諸所表  
俟以汝遷可

康執權落致仕與郡

朕敷求黎獻用乂我民亦惟有若商之老成人周之耆

壽俊雖或得以自休于厥家若時詢猷則必復即我御  
事踐厥服具官某抱道淳篤迪于多聞克遠省于古人  
之德在朕初載命之曰汝惟奮于膠庠首茲多士時惟  
汝式用陟汝于禁路祇乃比事厥職修顯罔有內外茲  
三十年越其告歸用嘉汝之丕治肆朕今立政惟屏儉  
朋惟圖舊人罔敢播棄我黎老矧有遺于大耄之用汝  
心未厭亦尚克堪往綏有邦俾民訓于爾德可

鄭望之落致仕名赴行在

朕蒐賢簡能穆布在位猶懼其有遺才也訪故老于菟  
裘之營得所謂守善純固黃髮不怠可以表儀當世者  
則又將襄輪以招之具官某一代耆英安于靜壽簪橐  
之望今三十年散金丘園固無愧乎止足之義矣然昔  
之謝事者或以陋巷與政議或以歲時為朝臣蓋年彌  
高而德彌劭者世所尊身之老而才之壯者謀必審朕  
意所屬卿宜未忘盍亦膏已垂之車紆既解之紱而來  
歸也行觀遠用入告嘉猷可

蕭振職事修舉轉四官

漢代以承流宣化責成師帥之臣宣皇以贈秩賜金用  
獎循良之吏念中興之歲久思外治之時修選建仁賢  
輯寧方夏將使邇遐之共貫莫先勸沮之兼明爰錄顯  
庸遂申褒典具官某材資卓傑智慮光明憲邦全文武  
之能臨下合寬嚴之度楚令尹三已無愠色何歎於心  
杜延年再用有治名實堪其事比雪池陽之屈復勤蜀  
部之臨策竹歡迎豈止一方之風動芟棠聽訟不煩三

令而化孚護列城以相安綏遠氓而用裕庶平不擾遠  
追建校之風審固多謀坐得籌邊之略爰稽最績允謂  
殊勞內閣陞華特陟通班之峻崇階錫寵更加寓祿之  
優集此寵章用為釀賞噫五十城之重寄予復何憂二  
千石之名流爾最為冠往其勵志共此榮懷可

汪勃知湖州職事修舉特轉三官

天下本無事庸人或至於擾民俗吏多虛名顯賞莫先  
於貴實朕清心以理庶務褒德以懷萬方有嘉慈惠之

師茂著循良之迹欲彰厥善何愛於恩具官某以靜粹  
持身以寬和服物浮沈州縣久安平進之塗佐佑樞機  
晚契老成之望當急流而去位能掃軌以全名比從岩  
壑之居起鎮股肱之郡避堂而浴治道簡易為先酌水  
以振清風廉平可法惟無心求赫赫之譽故不伐有謙  
謙之光比再露于需章期退全于晚節累詔加勞為民  
借留眷言茗雪之邦久闕龔黃之政有如靜治宜被褒  
揚夫吏數易則下不安美成在久我無為而民自化政

貴有常往膺增秩之榮益懋承流之績可

洪遵除起居舍人

朕惟盛德之後必有達人雖天之報施理固如此亦教  
忠有所自也昔爾父忘身犯難能盡節于我國家而爾  
弟昆一門競秀以詞學中選者三人焉爾居伯仲間又  
有最良之譽再登館閣未究汝長困于閔難朕所渴見  
今既名對思所以處爾者其可使之遠于朕乎豹尾之  
中螭頭之下出入侍從爾宜與焉其勉厥修尚無愧於



前人之績

洪邁除祕書省校書郎

士之有懷材抱藝雖其未遇世固以遠大期之及乎得時惟上所用人皆不以為過何者公道立則賢能興有蘊於內不可揜於外也爾以宏博舉十餘年矣久坐困蹶不得列于英躔今也召歸校讎天祿顧爾兄方載筆竚陸而爾又有登瀛之榮棟莠聯輝薦紳盛事並厚所養為邦之光

王剛中除起居郎

左右史密侍殿坳六司記注職雖一也然其位序則以東西二省為之別焉朕得雋才不嫌詳試以爾器閣用遠有守不阿頃自著廷列之螭陸造前論事纒纒可聽夫古之史官各有所記言與事莫得而相入也言為尚書事為春秋今之設員亦本前制命爾更踐豈無素哉爾其兼舉而茂明之以稱朕褒遷之寵



海陵集卷十六